



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 8

Yangia anidakangma :



Tir Yimyim



tir_yimyim



tir yimyim

TAPAK 7

Dominic Thiem tennis asaya nungi anisungzüker

Blinken-i Middle East nung rara tembangtsü ajungshir



VOL. XXII ISSUE NO. 15 (ADOK 15) DIMAPUR YANGTEPNÜ (THURSDAY) MONGPUTENI (OCTOBER) 24, ₹ 5.00

Mon district nung PMAY-G beneficiary temi temeten bushir

Dimapur, October 23, 2024 (TYO): Mon district kübok Pradhan Mantri Awas Yojana - Gramin (PMAY-G) beneficiary tem dang nungi sen meshizükba atema ken o tulu ka adoka lir.

PMAY-G beneficiary temi iba dak sendakba nung Department of Rural Development Nagaland tsüngdang RTI ka benok saka Department-i sen poisa ka dang katizüka mayur ta telangzüba nguogo.

Iba nung ajemdaker beneficiary temi October 22, 2024 nü temeten meshia lungkak aittsüba sentong ka ayonga liasü.

Ajisüaka, Mon district nung Deputy Commissioner-i Department dang nungi telangzüba meshia züluba shidi ano manguba agi lungkak aitba thinena atatsü mepishiba nung ajemdaker PMAY-G beneficiary temi sentong thinenogo.

Osang angazükba agi yim kar

nung PMAY-G beneficiary shia dang Rs. 20,000 aser kar nung Rs. 18,000 meshi aser kari senji agütsü aser karibo magütsü ta lir.

Yimtsüng ka nungbo RTI telangzüba nung ajemdaker beneficiary tem dang nungi sen meshizüka aliba meyipa agütsüogo ta ashir.

Mon district nung PMAY-G beneficiary telok ka tenteta lir aser parnoki temeten mangu tashi noktaksü ta metetdaksüogo.

Pradhan Mantri Awas Yojana ya 2016 küm tenzük aser iba scheme indang nükjidong ya loktiliba nung sensaktiba tia nung alirtem nem ki agütsüsüba lior.

Socio-Economic Caste Census 2011, Gram Sabha approvals aser geo-tagging nung ajemdaker beneficiary tem shimer aser senotsü timi agütsüsü atema Centre sorkari IT aser Direct Benefit Transfer (DBT) mapa inyaker.

Union Minister Arjun Ram Meghwal-i Tseminyu semdang



Union Minister of State, Arjun Ram Meghwal-i Tseminyu district nung senden ka amendang agiba noksa angur.

Dimapur, October 23, 2024 (TYO): Union Minister of State for Law & Justice (IC) MoS Parliamentary Affairs, Arjun Ram Meghwal-i October 22, 2024 nü Tseminyu semdang aser senden ka amen.

Union Minister Meghwal-i telok balala den ajurutepa sensaksem dang Tseminyu district nung bank talila lapoktsü nungdakba den sensotemia centrally sponsored scheme tajanzük agitsü atema bank accounts lapoktsü ayongzüka liasü.

Tseminyu nung district court, district hospital aser Tseminyu Town lenmangtem yanglutsü

atema sen agütsüsü ta paisa nangzük. Paisa lennirtem dang cultural complex atema shidi zülutsü ashi.

Meghwal-isa Tseminyu nung Pradhan Mantri Awas Yojana (PMAY) scheme tenzüksü nangzük.

Meghwal-isa K. Station village semdanga yimdaklirtem den ajurutepa sensaksema liasü.

Iba mapang Union Minister Meghwal atema Addl. PS, RK Mishra, Law & Justice Advisor TN. Manen, Commissioner Secretary Law Justice aser MLA & Chairman DPDB Tseminyu, Ar. Jwengaseb nung liasü.

Bodbarnü Meghwal-i

Meriema nung high court yangluba tesem semdangdang osangbener den ajurutepa jembia liasü.

Idangji high court building yangluba atema senotsü teyari agütsüsü aser Nagaland high court balaka amenoktsü atema mapa inyaksü ta pai nangzük.

Chief Minister Neiphiu Rio den senden amendang high court dak sendakba onüktem lemsatepogo ta Union Minister-isa ashi.

Parliament winter session mapang Nagaland nung Law and Justice Advisor aser Commissioner & Secretary na jaoka item onüktem lemsateptsü ta paisa ashi.

Kaketshir dak teka sangshia auyar 3 apu



Dimapur, October 23, 2024 (TYO): October 10, 2024 anepdang 3:50 ako meta kaketshir ka marathon sentong ka nung shilem agitsü atema aodang len tom nung mejangjaba nisung aseme pa dak teka sangshi aser pa phone den yangkhu auyar gari ka nung jena ao.

Kaketshir ya Dimapur Government College nung B.Com. 2nd Year azünger aser pai iba tatalokba atema kasa anogo nung Sub Urban Police Station nung FIR ka agüja liasü. Iba lendong ya Thakur Bari area nung atalok.

Police-i FIR nung ajemdaker bushisingdangtsü tenzük aser electronic surveillance o human

intelligence nung ajemdaker temulung melemi bilemer nisung asem maitsü jangjatet.

Sub Urban PS nungi police telok kati parnok mita aru aser October 22, 2024 nü Dimapur kübok tesem balala nung par asem puogo. Parnok ajak ya NSCN-K (Khango) züngsemtem lir aser parnoki amshiba gari, kaketshir ket nungi rakzüka bener aoba mobile phone ajak ngutetogo.

Par asem ya NSCN-K (Khango) nungi Phushito Yeptho (52 yrs.), Akheto Shohe (48 yrs.) aser Vikiho Aye (37 yrs.) nung lir aser parnok ajak ya Leacy lir, ta Commissioner of Police, Dimapur-i metetdaksü.

Longmisa yim anasa gari tsüktep 1 kanga mejungi yiru

Mokokchung, October/Mongputeni 23 (TYO): Tanu nikongdang 1:30 ako meta Maruti Van ka Mokokchung town nung osettsüset shishia bener Litem yimtaki aoba mapang Bolero kati atsük aser van anisangji kanga mejungi yiru.

Longmisa aser Litem tsüngda Longmisa yimtak nungi kilometer 3 shi lur kelen iba lendong ya atalok.

Accident atalokli ajururtemi iba osang zülur dang ashiba agi

Bolero ya kangasa speed agi Van tsütsü aliwaji agia aruagi atsük. Van tejaklen driver tsütsülen kanga mejungi atsükba ajanga driver-baji tekong anasa rangbok aser tetsüng kanga mejungi yiru aser Mokokchung District Hospital bushia bener ao. Van gari nungya driver-ba kisüng Mokokchung nungi Litem-i aorba liasü

Bolero ya Sorkar gari asü aser driver aser tetsür ka ta tetsürlaji Dimapur-i temang reprangi aorba iba accident ya ajuru ta ashi.

Nagaland Police-i Investment Scam atema metetdaksür

Dimapur, October 23, 2024 (TYO): RGA ta ser company kati Nagaland nungi nisung aika nem sen aika meyipa agütsüsü ta mesükba osang angazük saka iba inyakyim nung tim masüba ajiteter ta Nagaland Police-i metetdaksüogo.

Iba inyakyim ya Ponzi Scheme ka ama lir kechiyong tetenzük nung Investors nem sen meyipa agütsür aser nisung tasen anir arurtem atema down line percentages agütsür, ta Nagaland Police-isa ashi.

Dimapur, October 23, 2024 (TYO): Dimapur nung Sumi nungeri ozüng alema inyaksangshiba ajanga tenüng menük bentsür aruba dang masü saka Naga nunger rongnung timtem adokdaksür ta Dimapur Sumi Council (DSC)-i metetdaksüogo.

Dimapur nung Sumi nungeri tanga Naga kintem anema mapa tamajung kecha meinyaksü ayongzüker. Lokti den meputepba inyakyim ajanga kijatem dang masü asenoki Naga nunger den tesentaktep raksatsür anungji Sumi nunger tanur aser tain ajaki ibala mapa meinyaksü nenshir, ta DSC President Shikuto Yeptho aser Media Secretary D. Jonah Achumi nati sangdong ka nung ashi.

Sumi kibongtem aser taintemi lanuputu len anitsü aser parnok dang yimyatsüya tajung sayutsü ayongzüker ta DSC-isa ashi.

"Tawa Sumi nunger kari

Iba inyakyim ajanga sen akoksartemi 1930 (Citizen Financial Cyber Fraud Reporting and Management System) nung phone ajanga mesüra website cybercrime.gov.in ajanga ken o benoktsü akok ta parnokisa shiogo.

Iba inyakyim ajanga sen akoksartemi 1930 (Citizen Financial Cyber Fraud Reporting and Management System) nung phone ajanga mesüra website cybercrime.gov.in ajanga ken o benoktsü akok ta parnokisa shiogo.

mapa tamajung inyakba ajanga asen kin asoshi maaksü bentsür aruogo aser tanga kintem den meputep adokdaksüogo. Pastor ka dak teka sangshiba den tashiyim agi sen meshiba aser tax saruba, auyaba aser tanga mapa tamajungtem ajanga DSC lennirtemi iba tebilemstü atema olemtepogo. Iba tatalokba ajanga Sumi nunger asoshi maaksü aser tenüng menük bentsür aruogo" ta DSC ketdangpurtemisa ashi.

"DSC-isa yimtsüng, kidong aser tesemtemi pei pei züngsemtem azüoktsü aser tebilemstü khuret bona mapang shitak nung item tatalokba atema mapa inyaksü ayongzüker. Kin ajak nung nisung tamajungtem kar alir saka ozüng alema inyakba mapa ajak asen kini dang inyaker anungji asenok ajaki iba atema süoki ia bilema shisadangtsüla aser asenok tsüngda aser tanga

Iba inyakyim ajanga sen akoksartemi 1930 (Citizen Financial Cyber Fraud Reporting and Management System) nung phone ajanga mesüra website cybercrime.gov.in ajanga ken o benoktsü akok ta parnokisa shiogo.

Iba inyakyim ajanga sen akoksartemi 1930 (Citizen Financial Cyber Fraud Reporting and Management System) nung phone ajanga mesüra website cybercrime.gov.in ajanga ken o benoktsü akok ta parnokisa shiogo.

kintem den tesentaktep tajungba yanglushitsüla" ta parnokisa ashi. Dimapur municipal area nung DSC kübok sectoral units 14 lir aser iba nung kilen 10,000 shi lir. Iba tatalokba ajurudang tanga Naga kintem kin o kin ken o ka ama mekümdaksüi tamasa DSC ketdangpurtem den tongteptsü mepishir, ta ketdangpurtemisa metetdaksüogo.

"Telok tasentem tenteta aotsü melena DSC-i ajak den longjemer timi ken o tem angatetteptsü merangtsü. Asen loktiliba nung mangatettep aser khuret ajak asenok longjemer koktetsü" ta parnokisa ashi.

DSC-i Naga Council Dimapur (NCD) küm 75 ajungba atema tenüngsang agütsüba metetdaksüogo. Parnokisa NCD platinum jubilee benjungmong nung Sumi nunger ajaki amalitepa yariteptsü mepishia metetdaksüogo.



Swavalamban Connect Kendra ajanga EDUCENTRE den lungjemer White Hall, Noklak Village nung October 23-25, 2024 anogotem asoshi Entrepreneurship Development Program (EDP) ka tenzükogo. Iba sentong nung zünger mapa mangu aliba lanurtem, business establishments, kaketshir, tsürabur aser temulunger tem nisung 70 dak tema shilem agitagi.

NBSE aser NSACS lungjemer tesayur nem training agütsütsü

Dimapur, Mongputeni/Oct. 23 (TYO): Nagaland Board of School Education aser Nagaland State AIDS Control Society (NSACS) lungjemer October 29, 2024 nikongdang 1:00 ako nungi 3:00 ako tashi Kohima, Mokochung, Tuensang, Mon, Phek, Wokha, Zunheboto, Dimapur, Chümoukedima, Niuland, Noklak, Longleng, Peren, Tseminyu aser Shamator districts tem nung aliba tesayurtem atema Adolescence Education Programme (AEP) kübok anogo ka online training agütsü.

AEP ya Ministry of Education (MoE), Department

of School Education & Literacy aser National AIDS Control Organisation (NACO), Government of India lungjemer tenzükba lir.

Nagaland nung NSACS yagi AEP kübok tesayurtem asoshi 2010 küm nungi training agüja arur. School tem nung arishi küm den apet adolescence education nung ajemdaker life skills training agüja takum nung tayongzükba balala ajurudang koktettsü asoshi teinlonglong kaketshirtem shisatsü aser skills ulushitsü atema shisaliok agütsür.

Iba training mapang HIV/AIDS aser STI, HIV & AIDS

(P&C), Act 2017 aser 'Growing up and Adolescence Reproductive Sexual Health' amala onüktem nung ajemdaker jembitsü.

Anungji shia aliba district nung aliba Heads of Registered Institutions ajungai iba online training nung adentsü tesayur ka-ka yoktsüla, ta sangdong ajanga ashi.

Iba training sentong atema registration link ya district WhatsApp groups aser school tem indang email ID nung lemsateptsü. Register süa aliba school ajunga nungi tesayur adentsüla aser reprangtsü, ta sangdong ajangasa ashi.

NBSE-i SBIF ASHA Scholarship Program 2024 atema metetdaksür

Dimapur, Mongputeni/Oct. 23 (TYO): India nung scholarship sentong tulutiba rongnung ka, SBIF Asha Scholarship Program 2024 ya Class 6 nungi 12 tashi atema tang lapoka lir, ta Nagaland Board of School Education ajanga Heads of Institutions ajunga dang sangdong ka ajanga metetdaksüog.

Iba scholarship ya SBI Foundation indang lir, koba ajanga India tesem ajunga nung makamaiter kibongtem nungi meritorious students nem senotsü teyari agüja parnok maneni shisaliok bushidaksütsü nükjidong lir.

Taküm iba sempet atema India nung State aser Union Territory shia nungi top 300 most meritorious students shimtsü. Shimtetba kaketshir shia nem senpet sen 15,000 agütsütsü. Iba yimya nung SBIF Asha Scholarship yagi India nung aliba region shia meritorious students tajungtem ajungmesoa züngdaksütsü nükjidong lir.

Iba scholarship ya tang

academic year nung Class 6 nungi 12 tsüngta azüngertem asoshi alitsü. Kaketshir ya taoba academic year nung marks shilem 75 mesüra tema ngur alitsüla. Applicants indang gross annual family income ya sen 3,00,000 tashi asütsüla.

2024-25 atema online nominations tenzükogo aser applicants temi online nomination ya October 31, 2024 tashi http://www.b4s.in/a/em_SBIFS10_20240918_1 ajanga agütsütetsü.

Iba scholarship dak sendakba nung mangatetba lira mesüra teyari aginüra 9007908205 Mehdi Hasan (Field officer, Buddy4Study) mesüra Helpline shiascholarship@buddy4study.com mesüra 011-430-92248 (Ext-303) ajanga tongteprateptsü akok.

Anungji registered schools ajungai nüngdakba mera agia pei reju nung azüngba kaketshir nem iba maongka agidaksütsü ayongzük, ta NBSE sangdong ajanga ashi.

Governor's Gold Medal aser Commendation Certificate atema tenüng meshir

Dimapur, Mongputeni/Oct. 23 (TYO): Republic Day, 2025 (January 26) mapang Governor's Gold Medals aser Commendation Certificates agütsütsü asoshi Home department ajanga recommendations atema application meshir, koba November 30, 2024 tashinung agütsütsüla.

Application nungya Annexure-A nung Format agüja aliba ama candidate indang details alitsüla, recommendations/citations züluba ya takap ka dak tali masütsüla, aser citations ya narrative form (A4 size) nung asütsüla aser citations copy

trok (6) den softcopy (word docx) dener agütsütsüla.

Gazetted Officers atema Recommendations/Citation ya concerned Head of Department ajanga agütsütsüla aser Administrative Head of Department ajanga yangji meyonngem agütsür Special Secretary, Home Department dangi yoktsüla, ta ashi.

Non-Gazetted Staff atema Recommendations/Citations ya Head of Department ajanga meyonngem agütsür Special Secretary, Home Department dangi yoktsüla.

Police, Home Guards, Prisons aser Fire Services

atema recommendations ya pei Director Generals/Heads of the Department ajanga Special Secretary, Home Department dangi arutsüla.

Tekalen shia aliba ketdangsur temi meyonngem agütsüba Recommendations/Citations den Annexure hard aser soft copy adentsüla.

NGOs, kija aser Deputy Commissioners indang Establishment kübok inyaker atema recommendation ya Deputy Commissioners ajanga Commissioner, Nagaland dangi yoktsüla aser pai meyonngem agütsür Special Secretary, Home Department dangi yoktsüla, ta metetdaksü.

Kohima nung DLC aser DLMT training agütsü

Dimapur, Mongputeni/Oct. 23 (TYO): PARAKH Rashtriya Sarvekshan atema DLC aser DLMT training ka October 22, 2024 nü SCERT, Nagaland nung PARAKH ajanga SCERT, Nagaland, Directorate of School Education aser Samagra Shiksha den lungjemer agüja liasü.

Iba training nung metetpelaba sentong Joint Director and Cell Head Assessment Cell, SCERT Nagaland, Moalong Imty lenisüba kübok agi aser Additional Director SCERT, Nagaland, Kerüüpheu Rupreo ajanga pela agizükba o jembia

liasü. Iba sülen Deputy Mission Director, Samagra Shiksha, Kelhikha Kenye-i training nükjidong rateta ashi aser CEO PARAKH Prof. Indrani Bhaduri-ia virtual yimya nung jembia.

Iba training nung Nagaland nung aliba districts 16 nungi DLCs aser DLMs 55 dena liasü, kong PARAKH Rashtriya Sarvekshan aser survey indang inyaksangshi tongmelang agi sayu.

Iba training nung shisalen sayur ya PARAKH, NCERT nungi Dr. Sukhvinder aser Madhusudan liasü.

PMKSY WDC 2.0 kübok Sanis nung machine lema agütsü



Wokha district kübok Multi-Purpose Hall, Sanis nung October 23, 2024 nü PMKSY WDC 2.0 kübok machineries lema agütsüba mapang tangokba noksa ka angur.

Dimapur, Mongputeni/Oct. 23 (TYO): PMKSY WDC 2.0 (Livelihood & Micro-Enterprise Component) kübok project villages nem machineries lema agütsüba sentong ka Department of Land Resources ajanga District Project Officer, Wokha kübok Multi-Purpose Hall, Sanis nung October 23, 2024 nü ayongzükba liasü.

Sentong akhumtong EAC,

Aitepyong, Pukha Lam ajanga aluyimer tem dang bendanga agütsür temulung agüja aser saksalema inyaksü ayongzük aser department ajanga teyari balala agütsüba agitsü ajungshia liasü.

Pai aluyimer dang kidang kibong nung rongsen aitba tali akumtsü asoshi machineries tem kanga kumdanga amshitsü aser nüburttem den yariteptsü ayongzük.

Iba sentong nung DPO, Wokha, Puthuto Natso ajanga PMKSY WDC-2.0 project activities indang rateta ashi aser department-i technical tsütsü aluyimer akokba lenmang nung yaritsü renema lir, ta shi.

Iba mapang Power Tiller, Rice Mill & Rubber Sheet Roller Mac amala machineries tem lema agüja liasü, kong yimtsüng asem nungi teyari agir nisung 22 dena liasü.

October 28 nü Dimapur DPDB senden amentsü

Dimapur, Mongputeni/Oct. 23 (TYO): Dimapur District Planning and Development Board indang senden ya October 28, 2024 nikongdang 1:00 ako nungi tenzükba Deputy Commissioner, Dimapur indang Conference Hall nung amentsü, ta sangdong ka ajanga ashi.

Iba senden ya Deputy Commissioner, Dimapur, Dr. Tinojongshi Chang lenisüba kübok agitsü aser district terenlok asoshi ken o balala jembitsü, anungji züngsem ajak iba senden nung medema arua adentsü ayongzük, ta sangdong ajanga ashi.

NSCN/GPRN-R (Akato) ajanga gari kanguteta lir

Dimapur, Mongputeni/Oct. 23 (TYO): NSCN/GPRN-R (Akato) ajanga chassis no. MALC381CLFMO21041 aser Engine No. G4FGFU994908 aliba subcompact crossover SUV Hyundai Creta gari ka nguteta lir, ta sangdong ka ajanga ashi.

Gari kiburi nüngdakba documents bener arua GSO-2 office nungi anogo 7 tsüngta iba gari agizüktsü akok, ta sangdong ajanga ashi.

Osang tejangjaba metettsü asoshi gari kiburi mobile number 7005525977 ajanga tongteprateptsü akok.

KI TAJUNG KA AYOKER

Half Nagarjan, Dimapur (Near DABA tenla ki)
GROUND + 4 STORIED BUILDING.

Area : 4800 Sq ft
Total Income : Ita nung bara lakh ka shi arur.
RED BOOK & PATTALIR.
Jenjang : Rs. 2.5 Cr. (negotiable)
FOR MORE DETAILS PLEASE CONTACT: 9366495873.

Russia nung PM Modi aser China Tir Xi na senden amen



October 23, 2024 nü Russia kübok Kazan yimti nung 16buba BRICS senden alidang kentenba sentong ka jakdang China Tir, Xi Jinping, Russia Tir Vladimir Putin aser India Ato kilonser Narendra Modi nunger tangokba noksa nung angur.

New Delhi, Mongputeni/October 23 (Agencies): Bodhbarnü Russia kübok Kazan yimti nung BRICS senden alidang Ato kilonser, Narendra Modi aser China Tir, Xi Jinping na ajurutepe jurila senden ka menogo, ta ketdangsertemi metetdaksü.

Testüiba küm pongu tsüingda tang mezüing Modi aser Xi na senden official süa amendang Modi-i India-China tsüingda arrtsülen raraba indang süoka jembiba den külemi arrtsülen tesünep aser yimjung alitsü atema ayongzük.

China Tir, Xi Jinping-ia India den tongtepratep tajungba akümtsü lemsatep. Tena minute 50 shi senden mena liasü. Anogo ana tejaklen India aser China nati anüdoklen Ladakh kübok Line of Actual Control (LAC) nung sepaitem patrolling dak sendakba nung tezüngzüktep kar agiba den point pezü nungi sepaitem aienshitsu lemtetogo aser tanüngba mangatettep-a ajak bentettsü bangjemogo.

2022 küm November ita nung Indonesia Tiri ayongzükba G20 lenirtem senden nung Modi

aser Xi na mapang tatsüka ajurutepe liasü.

Yaküm August ita nunga Johannesburg nung BRICS (Brazil-Russia-India-China-South Africa) senden alidang Modi aser Xi na mapang tatsüka ajurutepe liasü.

2019 küm October ita nung Mamallapuram nung lenir ana ajurutepe senden amenba sülen 2020 küm May ita nung Ladakh arrtsülen Galwan Valley nung India aser China sepaitem tsüingda rara adokba sülen linük ana tesendaktep kanga mejungi aküm.

Cyclone 'Dana' Bhitarkanika park aser Dhamra port tsüingda atongtsü: IMD

Bhubaneswar, October 23 (Agencies): Bodhbarnü Indian Meteorological Department (IMD)-i, Hokolbarne Odisha kübok Bhitarkanika National Park aser Dhamra port na tsüingda cyclone 'Dana' tzüküm tonga arutsü, ta metetdaksü.

Bhubaneswar nung aliba Regional Meteorological Centre nung senior scientist, Umashankar Das-i, "Cyclone 'Dana' ji Kendrapara district kübok Bhitarkanika National Park aser Bhadrak district kübok Dhamra port na tsüingda tzüküm tama atongtsü. Iba mapang nungji tzüyim nung tzüsem metre 2 tashi atutsü aser tzüyikümlen mopungji ghonda ka nung kilometer 120 tashi kera aontsü," ta metetdaksü.

Bhadrak aser Balasore district tem nung kanga nemzüka aliba tesemtem nung tzü metsüingtsü, ta metetdaksü.

Paisa sorkar ketdangsertem dang item tesem nung alirtem aienshidaktsütsü metetdaksü. Iba yipru mopung tesashi ajanga Odisha aser West Bengal na kongshitsu mapang ana nung lia Indian Railways-i train 300 dak tema service thinenogo.

South Eastern Railway-i express aser passenger train 150 dak tali thinenogo. Item train aika October 23 nungi October 25 tashi senzütsü sentong liasü.

Tensa tamajungba kümra SER zone nung ano train aika thinentüsü. Kolkata nung headquarters aliba SER zone kübok West Bengal, Odisha aser Jharkhand state tem lir.

Odisha nungi senzüba mesüra state ajanga senzüba train 198 thinenogo.

Eastern Railways-ia Patna-Ernakulam Express, Kolkata-Puri, Puri-Kolkata, Dibrugarh-Kanniyakumari aser Bengaluru-Guwahati densema express train aika thinenogo.

Bodhbarnü IMD-i, "Testüiba ghonda trok tsüingda Cyclone Dana ghonda ka nung kilometer 18 tekara liasü aser east-central Bay of Bengal nung liasü. Iba cyclone ya northwest tsütsüleni aotsü aser Brihostibarnep tashi nung northwest Bay of Bengal nung kanga tesashiba akümtsü. Brihostibar aonung aser Hokolbar tashi nung iba cyclone ya north Odisha aser West Bengal tzüyikümlen Puri aser Sagar Island tsüingda süitsü," ta metetdaksü.



October 23, 2024 nü New Delhi nung aliba lenmang ka nung mopung temenen den külemi tzüsü alidak nisungtem gari aser auto nung senzüba noksa nung angur.

Bengaluru nung ki chirepba lendong nung nisung tenet süogo

Bengaluru, October 23 (Agencies): Bengaluru nung tzüinglu maneni aruba mapang tang tesüdak ki ka chiprepba lendong nung nisung tenet süogo.

Iba ki chirepba jana nungi Mongolbar aonung tasü mang ka angu aser Bodhbarnü tasü mang trok anguba densemabo ajak senteper tasü mang tenet nguogo.

Bengaluru kübok Babusapalya kiyong nung tenetben atongtepa asüba ki chirepba lendong atalokba sülen Fire & emergency department, National Disaster Response Force aser State Disaster Response Force team-i kümzükba maparen inyaka arudar.

Osangbenertem den jembidang Deputy Commissioner of Police (East Bengaluru), D Devaraja-i, tang tashi nung nisung 13 bo kümzükogo, ta metetdaksü.

Mongolbar aonung iba lendong atalokba sülen

Karnataka Deputy Chief Minister, DK Shivakumar-i iba tesem semdang.

Dy. Chief Minister-i, iba kiji ozüing alema asüba lir, anungji aibelenertem nem temerenshi tulu agütsütsü, ta metetdaksü.

Pai X ajanga, "Bengaluru nung iba kiji temelaba magii ozüing alema asüba lir, anungji ki kiburtem nem temerenshi tulu agüjang, ta ni tuyuogo. Iba tatalokba ya asenok atema tansütsü tatalokba ka lir. Tarutsü nungbo item ama tatalokba malitsü atema ki asütsü atema ajak nem temelaba meshidaktsütsü aser ki tesüdak reprangtsü atema team ka yoktsü," ta metetdaksü.

Iba building chirepba sülen nisung asem- Munirajareddy, Mohan Reddy aser Elumalai nunger anema Hennur Police Station nung FIR ka benokogo.

Ki kibur, Bhuvan Reddy puogo aser ki tamentep tenet nungi tamentep pezü yanglutsü contract agizüksang, Muniyappa-a police ket nung lir.

Priyanka Gandhi-i Wayanad by election atema nomination file süogo



October 23, 2024 nü Wayanad district nung AICC General Secretary aser Congress candidate, Priyanka Gandhi Vadra-i Wayanad constituency by election nung tokateptsü atema nomination file asüdang tangokba noksa nung angur.

Wayanad, October 23 (Agencies): Bodhbarnü Congress general secretary, Priyanka Gandhi Vadra-i Wayanad by election nung tokteptsü atema nomination file süogo.

Kasa anogo nung Kalpetta nung lai roadshow ayongzüka agiba sentong nung UDF nung inyakertem den lenirtem aser Congress party nung inyakertem meyrjang aika adenshia shilem agi.

Taküm Lok Sabha election nung Rahul Gandhi-i Uttar Pradesh kübok Rae Bareilly aser Kerala kübok Wayanad menden naprongla nungi toktepa takok angu. Iba sülen pai Wayanad menden azüingtettsüba ajanga tang iba menden atema Lok Sabha by election agitsüsa aküm.

Mongolbar aonung Priyanka den tetsü aser Congress Parliamentary party chairperson, Sonia Gandhi aser Lok Sabha nung Opposition lenir, Rahul Gandhi nunger Kalpetta tonga aru aser Bodhbarnü Kalpetta nung bus stand tasenba nungi tenzüka parnoki roadshow agi.

Roadshow nungji Priyanka den la kinüingbu Robert Vadra aser lar chir kata gari nungji liasü.

UDF nung inyakertem aser pusemertem meyrjang aika anepdang nungi tenzüka lenmang nung atatepa liasü. Parnoki ozülu balala amer Priyanka aser Rahul Gandhi nunger agizük.

Wayanad nung nüboyim sentong nung jembidang Priyanka Gandhi-i, lai küm 35 tashi election nung nüboyimja aruogo, ajisüaka tang mezüing lai la atema nübo ayimer, ta metetdaksü.

"Ni arrshi küm 17 asüba mapang nung ni mezüing 1989 küm kübu (Rajiv Gandhi) atema nübo yimja liasü. Küm 35 tashi election mapang nung ni kütsü, küdi aser külem inyakertem atema nüboyimja aruogo. Ajisüaka ni tang mezüing ni asoshi nüboyimer aser nenok dang teyari meshir," ta lai ashi.

Kasa sentong nung jembidang Rahul Gandhi-i, "Wayanad nungi MP ana alitsü. Lok Sabha nung Wayanad nungi official MP ka (Priyanka) aser unofficial MP ka (Rahul) alitsü aser tenati nenok tebilemetsü onüktem atema ola adoktsü," ta ashi.

Wayanad Lok Sabha by election nung Priyanka-i LDF nungi Sathyan Mokeri aser BJP nungi Navya Haridas na den tokteptsü.



TIR YIMYIM YIMOBILEM (EDITORIAL)

DIMAPUR YANGTEPNÜ, OCTOBER (MONGPUTENI) 24, 2024

Lendong nungi jenbutüsü renemba

Menoknokbo menokdangtet, anungji menoknok anokba mapang lendong nungi kumzüksü asoshi renemtsüba dak alaka menoknok manokdaksütsüsa inyaksübo ano nisunger kolok agi tonga inyaka maka. Iba tangatetba nung tanü October 24 nü Nagaland nung Nagaland Disaster Management Authority (NDMA)-i National Disaster Management Authority dena ayongloker menoknok anokba mapang nisungtem peisasa tekumzükdak bushitsü lenmang aser tangatetba sayuba sentong ayongzuka amongba yagi, atangji, tarutsü nung nebortem lendong mapang kumzüksü imlar. Asenok Nagaland nung alirtem yabo onsara tia taka, Tsüngremi alima lendong kecha agia mekongshidaksütsüsa wazuka yuja lir. Ibayongji, asenoki tzümetsung, menoknok aser yipru mopung lendong tulu majuru aser majangshidang. Ashiko, iba jagi balaka asenoki tarutsü nung tsümetsung, menoknok aser yipru mopung lendong nungi kumzuka alitsü bilema kiojentema meyanglur aser kumdanga malir asütsüa akok. Aji oda, tang tashi Nagaland nungbo kisüjensütsüba maparen nung temzung ozung kecha yanglua maka aser tangar meyonga ajizuka mebenshir, anungji junger amai, kechiyong pei kiojen pei yanglunüdak pei yanglunütsü yanglur. Ibaji, lendong matalokli medem ataloknübo asenoksasa asenok atembangtsü sang soa ayu amai asütsü. Tanga limatem nungbo pei kimong nung pei sen agi pei ki yanglutsü asoshi yimten nungi temelaba nungdaker, kechiyong ali tashimaitdak nie ozü ki anung tonga tua yanglura, ibaji chirepa lendong atalok nungbo ozü kisung masü saka ozü kidanger ajak kasasa lendong ajurutsü. Iba jagi tesem shia kechikomala ki aser azüklen koba piga, anunglen storey kwikabo atutsüla ta ali tashi ait mait asadanger külenang iba yari kiojen yanglutsü temelaba agütsür. Ibaji dang masü saka mashi tesem ka nung ali tupoka aser süngdonglidong tsüngdoka ali aser tzü mopung menentsüsa kiojen aser terenlok mapa asüyonga meinyakdaksür. Aji oda, tangar temeteter aser tangateter limatem nungbo pei sen agi pei li nung pei ki yanglutsübaji mapa temela masü. Iba jagiang, alima lendongtem nungi meteta aser memeteti asen dang masü tangara dena kumzükter. Tajangshirtemi ashiba agi, alima lendongsa asüyonga menoknok anokba lendong nung asü-ama lendong atalokba yabo menoknok agi masü saka menoknok anokdang kiojen chirepa laoba aser tejenokdak tesem shitak bushia aotsüsa tangatetba aser terenemba maliba ajanga ataloker. Ibaji kodang bilemdangdir, tang asenoki yanglua akaba kiojentem ya asenoki asenoksasa tetsübutüsü bilemte. Atangji, alima lendongji menoknok dangbo masü saka yipru mopung aser tzümetsung agi tanga limatem nungbo tanüa tetsübutüsü amokmerendagi. Aji oda, asenokbo tenem nung alirji tzümetsung agi mekongshitsü ta mali mesüra onokbo tenem agi meketbanger alirji yipru mopung agi matongtsü ta mali. Asenoki meteta Dimapur aser Tuli tashi nungbo mapang mapang shia tzümetsung lendong ajurur. Itemji asenoki ayong nembanga kiojen yangluba ajanga ataloker asütsüa akok mesüra asenoki endokba janaona aser plastic-tem agi ayong temdanga yur tzü yima molutet ataloker asütsüa akok. Aji oda, kilentzü kisung junga meyangluba agi tzü atsüngdaka yur iba jagi tzümetsung akümtsü ana nung dang lir. Kasaji, tenem agi meketbanga aliyonga asenok meketa süngdong tulu aliba arem melira tsüngrem mopung aйдangbo tetsükdakdak maka asenok kiojen ajak shitoka ponger aotsüsa ataloktsü. Item ajakji bilemdanga asenoki kisüjensü aser inyaksangshi ajak nung wainshin meteta inyaksü kanga nungdaka kumogo. Joko, tanü asungbo kitsük kirong lendong nungi kumzüksü asoshia mi kumdanga amshiba den light wiring aser light atsükba mapatem nunga kanga kumdangtsüla aser kisüjensüba yimya nunga akhi ama masü saka akok tashi ki o kin a tetsüngda lia yanglura, iba jagi alima lendong nungi kumzükba dang masü saka inyaksangshia tesadamba akümtsü aser tereprangtsü nunga topur tajungba asütsü. Atangji, Tsüngremi asenok kanga yarir saka Pai yaridi asüyonga asenoki mekümdangra asenoksasa asenok lendongi aitsü ana nung lir.

OLEMSABANG

ABAM NUNG NETSÜNG LENISÜBA (LAY LEADERSHIP] NUNGDAKBA
(Ao Baptist Arogo züngsem tajung ajaki bilemdangtsü onük ana)

~ Rev. Dr. Nuklu Longkumer

1897-1947(50Years)

1897 kum Ao Baptist arogo Mungdang S.A.Perrine Tir/President sür tenzük. Missionary-temi iba Mungdang kum eshika ketdangsüa arur 1908 nungibo iba Mungdang lenisüba ya lim arogo nütsung lenirtem (local lay leadership) nem anishidakja aru. Ao arogo otzüji kodang reprangdir ABAM 1947 nung kum 50 ajungba tashi nung Mungdang 12 nung Toklang tenzükter (Clergy) Tir liasü aser Mungdang 38 nung Nütsung (Lay leaders) Tir liasü.

1948 - 1997 (50 Years)

Ano 1948 nungi 1997 kum 50 tsüngdaji Mungdang 50ben agia liasü aser yangji arogo toklang tenzükter (clergy) Tir asüba 25 aser arogo nütsung (Layman) Tir asüba 25 angutsü.

1998-2023 (25years)

Tanü 1998 nungi 2023 tashi nung ABAM Tirji lim arogo Pastortemi (clergy) benlentepa inyaka arudagi.

Mezung bilemdangtsü onük. Tesüba kum ter dak tali nungi asen Aor lokti tesem balala aser media balala nung jembishinüba kaji "ABAM nung Tir ya Toklang tenzükter (Clergy) masü saka arogo nütsung nungi agi tajungba" Parnoki ashibaji ABAM Executive Secretaryji teti Laishir mongin ka-sa asütsü, anungji nübur liromedemtsu mechi Tirji arogo nütsung nungi mongin ka asütsüla. Ao Baptist Arogo Mungdangjibo Laishir temeja telok masü nungji Clergy aser Layman liromedema tenzuktsu meji lenisüba nungji arogo nütsungtem nungi shilem aika agitsü junger ta osang benteper. Kenkenbo ABAM staff rongnung timtem atoktsü, kenkenbo Impur nung tenzükertem nungi tangar nem tetlatetshidaksütsüsa maparen ajurutsü aser ajurua aruogo. Yamala tensa nung ABAM nung kodang Tirji Pastor ka südir pai arokaroka metongshitsütsü aser artsütsü tasü maittsü aser meiti aruogo, kechiaser parnok ajakji Laishirtem, theology azungba rokotem tang lir. Tsüraburtemi jembia aruba ama : "Shitsüi (monkey) tetsür nüken metsübur" Lai puti meteter rongnung akümtsübutep aser aria bilemba agi anunga lir. Medemer medemer dang tim lenmang sayua metongshiteptsü kanga tasak aser artsütsü melena ano kumzuka yutsütsü meranger. Arogo netsung mongin ka Tir ali nungbo tebilemte balala ajurudang teindangba lenmang nung melamela benteta aotsü kechiaser Baptist arogoji netsung agi akümba lir.

Tanabuba bilemdangtsü onük: ABAM Board aser Komiti balala aika lir aser item ajak nungji shisa-ngujemer balala nungi tangater aser rajema meteter alitsüla. Theology azünger kisung agia abensaa meinyaktetsü, Lawyer, engineer, doctors aser specialist kisung jagia ajakbo rajema arogo maparenji mayimjemtsü. Anungji Board/ Komiti ka nung züngsemtemji Toklang Tenzükter aser Nütsung kasasa (50% each) asü nung koda jungla. (Board ka ana nungbo mapettsüa akok)

Kum shia ABAM Board/Komiti balala nung term agi tonger züngsem shimshitsü atoker aser ibaji aiben mongdang mapang Nungtet komiti (Nominating Com.) ka shimteta inyakdaksür. 2024 kuma Board aser Komiti balala nungi term agi tonger nisung 56 (31%) tasen shimtsü. Yamala shimshidang kinük tabensa nungi nisung tapet shimtsü asoshi Ao arogo ajak metetjema alir Nungtet komiti züngsem aikabosa malir. Kum eshika tejaklen ABAM nung tenzuka alidang Staff eshikati dang term agi atongertem melena nisung bushia bendenersa Sanen Luden nem agutsü aser itemji teloki agizükasa ayu. Impur nung alir tenzükertemi metetbaji lim arogo nung toklang tenzükertem tang liasü anungji itemji tang zülur agutsü. Yamala inyakba jagi komiti balala nung 2023 kum ABAM lemtet nungji 71% Toklang Tenzükertem dang asenoki angutsü. Komiti shiaji Toklang Tenzükter tesadang aser nütsung tesadang ta alinungbo tebilemte balala arudang shisa reju balala nungi anguba shisatsü jagi arogo aser lokti koda yarila. Anungji ABAM nung Nungtet komiti ya standing komiti ka ama alitsüla aser parnoka kum nung anabenbo meeting mena kinük aser tesem balala nungi tapet nisung bushia inyaksü mapa nungloktsütsüla.

Arogo nütsung aser toklang tenzükter balalai asen oshi anogoshia atokba osang kaket nung onük tajung aser yabo melenshidaksüner/inyakdaksüner ta aika zülua arudagi saka itemji kangasa tongtipang karbo lim arogo aser ABAM Board/Komiti balala nung agenda kümer jembia ABAM Sanen Luden dangi abenba mangur. Tamangertemi ayimtenba aser parnok ajepba ola ya arogo lenirtemi angashitsü nungdaker.

Bilemdangtsü onük ana tatsü agi yamai lir.

1. 2025 nungibo ABAM nung Tir ya Lim arogo netsung mongin (lay leaders) nungia melentepa shima inyakdaksü tajungba asütsü. (tat. 2025 kum ya ABAM Tir Pastor ka asütsü lir anungji Tatong Tirji Nütsung nungi shimtsüla aser yamaji belentepba aotsü.
2. ABAM nung nominating Komiti ya ajungben shimba komiti ka masü saka Standing komiti ka asütsüla.

2023 ABAM lemtet nung reprangra Board aser komiti balala 18 nungi züngsem ajak agi 178 lir (Ex-Officio medeni) aser yangji Clergy 127 (71 %) aser lim arogo nütsung nungi 51 (28%) lir. Anungji tarutsü nungbo Board/Komiti ajak nung Arogo toklang tenzükter nungi tesadang aser arogo nütsung nungi tesadang shima inyakdaksü nung tajungba asütsü ta lemsateper.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Rev. R. Teka indang taküm otsü kakat ka sayaogo



October 23, 2024 nü Mokochung nung ABAM Executive Secretary, Rev. Prof. Mar Pongener-i Rev. R. Teka taküm otsü kakat sayatsü dang tangokba noksa nung angur. Kasa noksa nung sentong lenir, Süngkomen Baptist Arogo nung Associate Pastor, Matsung Longkumer-a angur.

Mokokchung, Mongputeni/ October 23 (TYO): October 23, 2024 nü Kapayong, Mokochung nung Rev. R. Teka'er kidang Ao Baptist Arogo Mungdang (ABAM) Executive Secretary, Rev. Prof. Dr. Mar Pongener-i Rev. R. Teka taküm otsü kakat 'Tasütait Tamang Walunir Rev. R. Teka Taküm Otsü' sayatsüogo.

Iba sentong nungji par kinüngertem, medemertem, Arogo lenirtem aser temeimertem aika densema liasü. October 23 anogo ya kaketzülur Rev. Teka arrshi küm 80 ajungba anogomong lir. Rev. R. Teka ya Impur Baptist Arogo nung küm 27 tashi pastor inyaka liasü.

Taküm otsü kakat nungji Rev Teka-i missionary aser pastor ka ama pai Tsüngrem tenzüka aruba, pai Tsüngrem angatetba, pai jembiba otem, pai inyaktetbatem aser pai Tsüngrem tenzüka mapang nung Kibubai pa taküm aser tangar taküm aika nung sayatenya mapa inyakbatem shisema lir.

Iba sentong nung jembidang

ABAM Executive Secretary, Rev. Prof. Mar Pongener-i, arrshi küm 80 indang ya Laishiba nunga alakteta shia lir aser sülem süngdong den medemdanga lir, ta metetdaksü.

Paisa, Rev. Teka küm 80 tashi arrshia aliba ya ajanga Tsüngrem taochi kuli sayur, kechiyong Kibuba meimer aser tenzükertem Kibubai kümzüka ayutsü aser moatsütsü, ta Laishiba nung shia lir, ta metetdaksü.

Mar Pongener-isa, arrshi küm 80 aser iba dak tali arrshia alirtem aika lir, ajisüaka Tsüngrem taochiji odangbo mangur, kechiyong Pa nungi temoatsü angutsü atema ajemalua aser Tsüngrem tsüba alitsüla, ta ashi.

Anungji taküm ka tetezü keta litettsü aser tangar atema tatishitsü tajung sütettsü asoshi Tsüngrem anasa tali aotsüla, ta pai ayongzük.

Kasa sentong nung jembidang Rev R. Teka-i, pa 1970s mapang nungi 1990s tetenzüklen tashi Tuensang nung tenzüka mapang pai ajangshibatem lemsatop.

Pa lanur asü dang pai timtem balala ajangshiba, Tsüngrem taochi ajanga pa kümzüka temoatsüma nung leniba paisa lemsatop. Paisa, iba kakat azungba ajanga tamangertem ajungmesotsü aser ajak temoatsü angutsü imlar, ta lemsatop.

Iba sentong ya Süngkomen Baptist Arogo nung Associate Pastor, Matsung Longkumer leniba nung agi aser Mangmetong Baptist Arogo nung Pastor, Dr. Lolen Imchen-i Tsüngrem temoatsü meshia sarasadema liasü.

Sentong nungsa Impur nungi nungtugu kentener, Tiameren Jamir-i ken ka aten aser Rev Teka'er semchirtem-Akumjungla aser Orem nati Rev. Teka atema sangro ka azüng.

Rev Teka'er jabaso, Er. T. Imlisunep Ao-i lokti pelaa agizükba o jembi aser Lanu Imchen-i iba kakat tongmelang agi metetdakja liasü.

Kasa sentong nungji Rev R. Teka den külemi tenzükertem aser tenzüka wadang nungi anisüngzüker alir Arogo lenirtemia jembia liasü.

Lifeway-i 'dyslexia' timtem alir tanurtem atema Laishiba adok

October 23, 2024: Lifeway Christian Resources-i 'dyslexia' timtem alir tanurtem atema tang mezüngbuba Laishiba ka adoktsüogo.

'CSB Grace Bible for Kids' ta ajaba Laishiba ya arrshi küm 7 nungi 12 tsüngda tanurtem atema lir. Item ama tanurtemi melemla züngtettsü aser kakat nung melemla rangloktettsü nükjidong nung Lifeway-i parnok atema iba Laishiba adoktsüogo.

'Dyslexia' ya angazüktsü asakba timtem ka lir, aser ibaji ajanga kakat nung zülua alibatem tekolok agi shisadangtsü atema tasakba kümdaksür. Iba timtem alir

tanurtemi kakat azüngtsü, zülutsü, ola adoktsü aser oshiboben balala jembitsü atema timtem ajangshir.

"Dyslexia ajanga tanurtem Laishiba nungi pilaa melidaksütsüla. CSB (Christian Standard Bible) Grace Bible for Kids ya ajanga tanurtem Tsüngrem den sendakteptsü aser Pa O nung tera ayangtsü atema nungdak peritsür," ta Lifeway Tir, Ben Mandrell-i metetdaksü.

Iba Laishiba ya 2K/DENMARK-i Cambridge University research department den senteper yanglu. Laishiba nung ojangtem, olong aser orentem tsüngda tawa tululu lir.

2 K / D E N M A R K tenzüksang, Klaus Krogh-i küm pongu tejaklen Grace typeface yanglu tenzüka liasü aser Cambridge University-i design ji yanglushiba nung yarisem. Typeface ji ajanga tazüngertemi "m" aser "n" mesüra "p" aser "q" ama kanga temesüktep ojangtem bendangteter. Laishiba nungji tapak balala nung sentsü balala lir, aser ibaji dyslexia timtem alirtemi melamela züngtettsü aser azüngdang ani-belem masütsü atema lir.

International Dyslexia Association-i ashiba agi, nütsüng shilem 15 nungi 20-ibo oshi dak sendakba tangazükba balala nung timtem ajangshir.

ANOGO ABEN TSÜNGREM DEN

Meimtsü angazükang

Medemeri medemer asoshi temeim nung aser nisung ajak asoshi temeim nung Kibubai nenok tali rena züindakjang.

Saka adianu meimtepba indang nenok dangi zülutsü tenüngdaksü maka, kechiaser medemer o medemer na meimteptsü Tsüngremi nenok dang sayur. 1 Tesaloknika 3:12; 4:9.

Tsüngrem temeim lir (1 Yn. 4:16). Pa yimyaji tabensa temeim lir, saka temenen yong Pa temeim Pa chirtem dangi teti yimya nung angati marur. Na temeim mesayuba kibong ka nungi iner alitsü akok. Nai meimba kar ajanga ne nem timtem agütsür alitsü akok aser tanaben iba timtem marudaksütsü atema ne mulungjang meranga kümer alitsüa akok. Nai kar dang meima alitsü akok saka o nung aser mapa nung temeimji mesayuteti alitsü akok.

Pauli Tesalonika nung aliba Khristantem meimtepa alitsü zülü (1 Tesa. 3:7). Parnoki koda meimteptsü aji sayutsü Paul menüngdak, kechiaser Tsüngremi parnok dang meimteptsü sayutsü. Tsüngremi parnok nem Pa temeim agütsütsü aser parnoki Pa anidakdang, Pai iba temeimji parnok ajanga renlokdaksütsü. Parnoki kar dang mememtettti lira Tsüngremi Tanela Temeshi ajanga parnoki meimdaksütsü.

Tsüngremi asenok tashi mait asoshi Pa taochi agütsür, aser asenoki tangar dang meimtsü renemdaksür. Idakji balaka kecha mali. Nisung tamajung danga meimtsü Tsüngremi sayur.

Nai kar dang meimtsü timtema bilemer asü? Tsüngremi na yaritsü. Pai nai ne tsürabur, kinüngbo-kinüngtsü, ne chirtem, ne tembartem, mesüra tsükchirtem meimdaksütsü. Nai ne temeim tetezü kaa mesayutetra, ibaji koda inyaksü Tsüngremi ne dang sayutsü. Temeim nung kiburji Tsüngrem lir. Na tangar den alidang temeim adokdaksütsü mesüra sayutsü Tsüngrem dang asüngdangang.

Hindu teloktemi Khristan sentong tulu ana nokdangtsü meranger

Mongputeni/October 23, 2024: India nung Hindu organization anati Chhattisgarh state kübok yimti ana nung Khristantem indang sentong tulu ana nokdangtsü meranger, ta International Christian Concern (ICC)-i metetdaksü.

Vishwa Hindu Parishad (VHP) aser Bajrang Dal telok nati police aser district ketdangsertem dang, Khristantem sentongji menokdangra aser yimsü balala amangertem tsüngda lendong atalokra nenok khuret asütsü, ta amokmerenogo.

South India nung kanga nungtugu sayutsüngir, Paul Dhinakaran-i November ita nung Bastar district nung Khristan sentong tuluka ayongzüka lir, aser ibaji VHP teloki nokdangtsü meranger.

Ano külen New Delhi nung nungtugu pastor, Bajinder-i tan ita Chhattisgarh kübok Bhilai yimti nung healing crusades ayongzüka lir, saka Bajrang Dal teloki ibaji nokdangtsü meranger.

VHP-i Bastar district ketdangsertem dang, Dhinakaran ya ozüng alema

inyaker ka, anungji pai sentong ayongzüka agiba ajanga district sobaliba aser yimsü raksatsütsü, ta metetdaksü.

VHP-isa, bendanger Khristan missionary temi Bastar aser tribal nisungtem Khristan yimsü dangi meyipdaksüba ajanga asen maitsü raksatsür, ta metetdaksü.

Ano külen Bajrang Dal-i, Pastor Bajinder-i taneptsüba aser sarasadem sentongtem ayongzüka agiba ajanga sensakertem Khristan yimsü dangi meyipdaksür, ta ashi.

Sayutsüngir Dhinakaran indang sentong ayongzüker Jesus Calls Global Ministry-i, Hindu yimsü alia amangertemi India sensotem temeden raksatsür, ta metetdaksü.

International Christian Concern (ICC) den jembidang Khristan lenir kati, sayutsüngitsü aser Khristan yimsü lemsateptsü atema linük temzüng ajanga Khristantem nem temeden agüja lir, ajisüaka sorkar ketdangsertemi temelaba agütsür aliba sentongtem anema Hindu nungertemi nokdaker, ta metetdaksü.

AO OSHI ANGAZÜKDAK:
TANÜ ANGAZÜKTSÜBA OJANG



Taor

(v) aoba mapang, tejajadak (going, leaving)

* Onok taor ajak agi nisung ter liasü.

Tap

(adj) oset tamajung küma adok, nüngatok, mangrang apung (mouldy, expired)

* Süngpak kima tzünglu ajaloka ayuba agi tap kümogo.

OLONG PAITEP # 6960

	1			2	3			
4			5					6
					7			
	8							
	9		10			11		
					12			13
14								
					15			

TIPIEN

- 2. Sü jeplok - (4)
- 4. O agi merenshi - (5)
- 7. Ayongküm li - (5)
- 8. Chiyungtsü mapangsüadok - (4)
- 9. Tsüngrem den jembiba - (9)
- 12. Saklok - (4)
- 14. Samaba mebushitet - (5)
- 15. Mejanga onü - (5)
- 16. Tzü shiruru ka - (4)

LANGTSÜNGLEN

- 1. _____ i - (4)
- 3. Kasa masü - (6)
- 5. Nüchi masü - (5)
- 6. Tashi endok - (5)
- 9. Langtem - (5)
- 10. Anü malidang - (6)
- 11. _____ kibur - (5)
- 13. Tebur tembar tsüngda jatepba - (4)

OLONG PAITEP # 6959 TELANGZÜBA

TIPIEN :

- 1. Semtu, 3. Lepko, 5. Bilem, 8. Ulu,
- 10. Tsüngpang, 11. Tesangwa,
- 13. Aoksa, 15. Putir, 16. Yipru.

LANGTSÜNGLEN :

- 1. Sayu, 2. Teb, 4. Kimong,
- 6. Lungkak, 7. Milak, 9. Zünga,
- 10. Temopu, 12. Walu, 14. Ali.

NAI-A YA METETTER MA



Andhra Pradesh yimtiba Amaravati nung October 22, 2024 nungi anogo ananü Drone Summit ka agidang Guinness World Records pungu tashi yanglutetogo. Iba show nung drones 5,500 shi amshi aser planet formation, landmark, flag (Indian flag), logo aser vehicle yanglua sayu. Iba sentong nung Chief Minister Chandrababu Naidu nem Guinness World Record certificates agütsü.

Arunachal nung Kameng Culture and Heritage Museum lapokogo



Guwahati, October 23, 2024

(Agencies): Arunachal Pradesh Chief Minister Pema Khandu-i Bodbarnü Kameng Culture and Heritage Museum lapoktsüogo.

Iba sentong nung Union Minister of State for Rural Development Kamlesh Paswan aser Gajraj Corps General Officer Commanding Lieutenant General Gambhir Singh na aden.

West Kameng district kübok Nyukmadung yimtsüng nung museum yanglu aser iba ajanga sobaliba senmang wazka ayuba den külemi rongsenketzüng

renloktsü.

Indian Army kübok Operation Sadbhavana nung shilem ka ama state-of-the-art museum yanglutsüogo aser Centre sorkar vibrant village programme den liromedema lir.

CM Khandu-i o jembidang Kalika Purana aser Mahabharata amala ancient texts nungi tatishtsü bener arua jembi.

"Indian Army-i arrtsülen model villages, border tourism aser infrastructure maparen balala inyaktsü tenangzükba ayuba Kameng Museum ajanga kuli

agütsür. Iba ya sorkar vibrant village programme den liromedema lir" ta pai ashi.

"Taküm küm tetenzüklen Chief of the Army Staff General Upendra Dwivedi-i New Delhi nung conclave ka nung arrtsülen renloktsü ashiba ama Indian Army-i kanga dang karaa iba mapa inyakogo" ta CM Khandu-isa ashi.

Union MoS Paswan-ia o jembidang Kameng region ya kanga tongtipang aser Indian Army-i civil-military cooperation aser regional development merangba atema tenüngsang agütsür.

"Indian Army-i arrtsülen security den socio-economic development atema mapa inyaktsü nenshir" ta Lt Gen Singh-ia ashi.

"Iba museum ya educational aser cultural hub tongti ka akümtsü aser alima tesem balala nungi scholars, researchers aser tourists arutsü" ta Lt Col Rawat-ia ashi.



**OFFICE OF THE
CHIEF ELECTORAL OFFICER, NAGALAND**

Presents

Online solo singing contest

Theme- "Be responsible- Go register in the E-roll TODAY"

OPEN TO ALL

3 Categories

ENGLISH
HINDI
NAGAMESE

2
Winners in EACH language category

CASH PRIZE

1st ₹10,000
2nd ₹5,000

Last date of submission: **28.11.2024**

Song entries along with lyrics/personal details to be mailed at :

ceonagaland.itcell@gmail.com

Declaration of Results - 10|01|2025

For any queries Contact: 6009147166 | 8729990926

@ceonagaland

Xi aser Modi nati Putin den Ukraine rara indang jembia

Kazan, Mongputeni/Oct. 23 (Agencies): Anüolen linük temi Russia senzüka yutsütsü merangba nung tamakok ajuruogo ta sayutsü nükjidadong nung ayongzükba BRICS senden nung China Tir Xi Jinping, India Ato Kilonser Narendra Modi aser danga BRICS lenir temi Russia Tir Vladimir Putin den Ukraine nung raraba indang jembia liasü.

BRICS nungya alima nütsüng yongsük shilem 45 shi aser alima rongsenketzüng shilem 35 shi lir.

Ajisüaka züngsemtem rongnung iba telok kanga kera ulushia akumba tsütsü telemsa aser tebilemba balala lir.

Putin-i Bodhbarnü iba senden tenzuka linük 30 dak temai iba telok nung adentsü

tejangraba lemsatepogo saka telok ulushitsü atema kanga kumdangtsü nüngdaker, ta shia liasü.

“Global South aser East nungi linük temi BRICS nung adentsü tejangraba senzüka yutsütsü ya tai asütsü,” ta Kazan yimti nung BRICS lenirtem dang Putin-i ashi.

“Kasa mapang BRICS tashi ajema akumba nungi nokdangtsü nüngdak. Iba telok yagi region nung rara, talisa Middle East aser Ukraine indang jembitsü,” ta pai ashi.

BRICS nungya ya 2001 küm Goldman Sachs chief economist Jim O’Neill-i Brazil, Russia, India aser China linüktem kanga sashia aintsüba indang research paper nung jatetsü.

Russia, India aser China

mapang shia ajuruteptenzük aser iba sülen Brazil bendenlok aser South Africa, Egypt, Ethiopia, Iran aser United Arab Emirates linüktem aden. Saudi Arabia tang tashi maden lir.

BRICS senden nungya China Tir Xi, India Ato Kilonser Modi, United Arab Emirates Tir Sheikh Mohammed bin Zayed Ali Nahyan aser Iran Tir Masoud Pezeshkian nungertem adener.

Putin indang foreign policy aide kati ashiba agi, iba telok ulushitsü atema talenba kar jembitsü aser linük 13 shi kuma ulushitsü atema mulungtepogo.

Modi-i yimjak nung Putin dang Ukraine nung yimjung aginer ta ashi aser Xi-ia Ukraine nung rara indang jembitsü Kremlin tekolakba den senden mena liasü.

Blinken-i Middle East nung rara tembangtsü ajungshir

Jerusalem, Mongputeni/Oct. 23 (Agencies): Bodhbarnü US Secretary of State Antony Blinken-i Israel dang Hamas lenir Yahya Sinwar asüba aser küm ka dak tema rara arudang iba telok indang tashi timba samatsür aliba maongka amshia Gaza nung rara tembangtsü ajungshia liasü.

Blinken-i ashiba agi, Israel nükjidadong aika tongteta Hamas tashi tuluba samatsüogo aser Sinwar densema lenir timba tepsetogo, anungji Gaza nung pua alir tanüngba nisungtem kidangi anur arutsü aser rara tembangtsü lenmang bushitsüla.

“Item takokji kanga yongya aliba tongtipang takok kumdaktsütsü tangya mapang lir. Pua alirtem kidangi arudaktsütsü, iba rara tembangtsü aser iba sülen atema lenmang tejangja nung rangloktü nüngdaker,” ta pa Riyadh-i aotsü renemba mapang osangbener dang ashi.

Gaza nung iba sülen aruba

ya kanga tongtipang asütsü aser tzükum nung linük balalai lungbanger aliba tesem tarutsü asoshi sentong tajung aser tejangja nüngdaker, koba Hamas mesüra Israel-i mazüoktsüla,” ta pai ashi.

“Hamas ainshidaktsütsü aser Israel-a melidaktsütsü asenoki iba rara tembangtsüla. Israel-i yangji meliner,” ta Blinken-i ashi.

Tensa tamajung nung alirtem, talisa Gaza north tsütsü Israel-i nüburtedang ainshitsü rongshia arur nem humanitarian supplies peria agütsütsü atema Israel-i tali inyaktü nüngdaker, ta pai ashi.

“Asenoki terenlok angur, saka aji teperi masü.”

Hamas-i October 7, 2023 nü Israel nung nisung 1,200 shi tepseter ano nisung 251 pua bener aoba ajanga Israel-i Gaza amakdang Palestine nung nung nisung 42,000 dak tema tepsetogo, Gaza nung tesem timba raksatsü aser yangji aliba

nüburtedang timba pei ki yutsür tesem balala nung jenoka lir. Gaza yanglushitsü asoshi linük balala nungi teyari tulu nüngdaktü.

Israel Ato Kilonser Benjamin Netanyahu’er sorkari Palestine nung telungpur telok Hamas tashi okshia samatsütsü nüngdaker ta ashiba dak alaka Gaza asoshi nükla tejangja ka yanglua mali.

Gaza Strip nungi Palestine nung ainshidakja Israel-i yimsü asütsü aser 2005 küm ainshiba Jewish settlers tem tanaben shilangdaktsütsü akok, ta Palestine nung temi shisabolur.

Ajisüaka Blinken-ibo Israel-i Gaza amokbanga yimsü asütsü United States-i memulunger ta nenshia ashi aser pa dang Netanyahu-ia iba ama sentong kecha mali ta shiogo, ta ashir.

Blinken ya Mongulbarnü Israel tonga aru, koba küm ka tejakdang Gaza nung rara tenzükter pai Middle East 11 ben buba semdangeral alitsü.

UNHCR-i Indonesia dang Rohingya nung agizüktsü mepeshi

Jakarta, Mongputeni/October 23 (Agencies): United Nations’ refugee agency-i Indonesia dang Aceh province nung hopta ka shi taolen makai aliba Rohingya nung refugee 150 agizüktsü mepeshia asüngdangogo. Local media sangdong balala ajanga ashiba agi, police-i nisung shibelenba ken o nung aija nisung asem puogo.

Rong nung mena alir nisung anabo süogo aser mashisa aliba tetsür ka densema nisung 11 mozüki kati anirogo, ta South Aceh kübok Labuhan Haji port nung angopuba lokti tentet tekolakba Muhammad Jabal-i Bodhbarnü Reuters dang ashi.

Angopurtemi iba rong ya taoba Brestobarnü angu aser hopta ka shi tzüym nung aliba sülen iba rongnung aliba tanurtemi chiyongtsü aser tajemtsü tzü meshia liasü, ta pai

ashi.

“Onoki parnok nem amtsük aser tzü agütsü. Parnok jenjang kanga mejungi lir,” ta Jabal-i ashi.

UN Refugee Agency-i sorkar dang Rohingya nung par linük tzüküm nung anenzüktsü asoshi temelaba agütsütsü ayongzükogo, ta otongdar Mitra Salima Suryono-i Reuters dang ashi.

“Onoki maneni ketdangsurtem den tongtepratepdar. Onok asoshi tinyaktsü tongtibangtibaji rong nung aliba Rohingya nungertem kümzüka toktsütsü asoshi lir,” ta laisa shisem.

Taoba küm Rohingya nung 2,300 dak tema Indonesia-i aoba UNHCR data ajanga sayuogo, koba taoba küm pezü dang nungi timba liasü. Parnok kanga aika aoba ajanga local tem mepelar aser ibayongji sorkari

parnok magizüki arudar.

Refugee tem timba November ase April ita tsüngda arur. Iba mapang nung tzüym tesüngjemba alir. Myanmar nung Rohingya nungertem kanga mezüngmeshia amshiba ajanga parnok kidanger linüktemi jenshia odar.

Regional police otongdar Joko Krisdiyanto-i ashiba agi, iba rong ya Bangladesh nung Cox Bazar nungi apuso aser October ita tanabuba hopta Andaman asetkongi aoba sülen Aceh leni oa liasü, ta Detik.com sangdong ka ajanga metetdaktü.

Police temi iba ya nisung shibelenba ken o ka asütsü ta bilemer, kechiyong parnok Indonesia-i mao tsüngda jelia senotsü meshizüka liasü, ta pai ashi aser ken o dak sendakba nung Aceh police-i Indonesia nung asem puogo.

40 BUBA DIMAPUR DISTRICT AOPENSIONER'S TELUNGJEM KÜM TATEM LOKTI SENDEN SENDONG

Anogo : 26th October 2024
 Mapang : 10:00 Am nungi
 Tesentepdak : Mr. & Mrs. Lepzük Jamir
 DDAPT Kimen, Kevijau Colony, Dimapur (Near Livingstone Hr. Sec. School, Dimapur)

- Menden : Ketdangpurtem
- Sarasademtsü : Wt. Süngjemla, Kevijau Colony
- Tesenteper pelaa agizükba aser Tasür bilemtetba : President, DDAPT
- Tajungshi O : Wb. N. Lmti Longktimer Rtd. Joint Secretary, Nagaland
- Osangtem agitsü : 1. General Secretary
2. Audit
3. Nominating Committee
- O lemtepa mapang :
- Nüngdak Mapang :
- Menden tatem O :
- Tatem sarasadem : Telok

Temetetsü:

- Küm tatem lokti senden sentong tsüngdong malemer saka Tir Yimyim aser Nagaland post nung adoktsür, Ajak medema arua atentsü ayongzükter.
- Agenda lira sentongmetenzükdang ketdangpur ket tongtsütsü mepishir.
- Sentong temer Chiyungba mapang alitsü.
- Iba sentong asoshi ajaki sarasadema atadi.

Sanen Luden, DDAPT

SANGDONGER

Chuchuyimpang Mongoya Prayer Garden nung 25th – 27th October, 2024, anogo asem (3), Healing Crusade sentong agitsü renema lir. Anungji nüburt shirnok shi aser Tanela nung taneptsü aginüa ali, temulunger ajak arua iba sentong nung Tsüngremer temoatsü agitsü pelashishia jaoker.

---- Mapang telemsa ----
Aonung – 5:00 PM; Anepdang – 9:00 A.M
Tongtepratepdak : 9856486841 / 8258802047

AO RIJU SANGDONG

Ao oshi terenlok aser zülumen lirumedemtsü atema Ao oshi agi züluba kakettek zülumen melenshija Ao Riju ajanga kaket adoktsü temelaba agüja arudagi. Maneni iba maparen inyaka aotsü alinung zülumen melenshitsuüpur (Proof reader) nübu nüngdaker. Anungji iba mapa inyaktü jangrartemi Ao Riju Mendenti mesüra tsünglanglen agüja aliba Google form link aser mobile number nung Yimpoktsü 10, 2024 tashi nung tongteprateptsü sangdonger.

- https://forms.gle/cXZVArFo5NAY3N1d6
- Mobile: 8787623758

Sd/-
Prof. Rev. Rongsen Lkr
Chairman

Sd/-
(S. Wati Ozüküm)
Secretary

Mexico nung Sinaloa cartel züngsem 19 tepset

Mexico City, Mongputeni/October 23 (Agencies): Mexico military-i Sinaloa cartel züngsem asütsü ta temulung melemba nisung 19 tepsetogo, ta Ministry of National Defense-i ashi.

Sinaloa yimti, Culiacan nung Hombarnü iba cartel nungi züngsem 30 dak temai sepaitem dang injang khaloktsüba sülen telok ana ya khatep tenzük aser cartel züngsemtem ya tepseta liasü, ta ministry-i Mongolbarnü sangdong ka ajanga metetdaktü.

July ita Sinaloa cartel indang co-founder Ismael “El Mayo” Zambada Garcia, shiba tang United States nung obendangdar, pa apuba sülen cartel yongtsü nung azütokshi tali kümogo.

Ministry-i ashiba agi, Hombarnü tepsetba cartel züngsemtem ya Zambada indang faction den sendaktepa alitsü ta amanger.

Hombarnü khatepba mapang local cartel lenir ka puogo aser ketdangsurtemi ashiba agi, pa ya Edwin Antonio “N” ta jangjaogo.

Sepaitemi meyiper injang khaloktsüba sülen tanga züngsemtem jenshia ao. Gari tenet aser machine gun densema prangbong 30 shi, injang, military-style vests aser helmet

tem iba tesem nungi ngutetogo. July 25 nü US-i, arishi küm 76 tain Zambada aser arishi küm 38 tain Joaquin Guzman Lopez na El Paso, Texas anasa airport ka nung apuba sangdonga liasü. Guzman ya Joaquin “El Chapo” Guzman’er jabaso lir, shiba iba cartel ngutetertem rongnung ka lir.

Zambada-i, Guzman Lopez-i pa pur oa US nung sepaitem nem bendanga agütsü ta shia Lopez aitsüogo.

September ita Zambada-i, temesepba mozü shibelenba, nisung tepsetba aser pa anema tanga taitstüba benoka alibatem nung pa aibelenba mali ta shiogo.

Guzman Lopez-ia, July ita Chicago federal court nung pa temesepba mozü shibelenba aser pa anema benokba ken o tem nung aibelenba mali ta shiogo.

Sinaloa nung telok balala tsüngda azütokshi lendong ya September ita tenzük aser tang tashi nung nisung 200 shi tepsetogo aser nisung 300 dak tema samara bushidar, ta official data ajanga metetdaktüogo.

Mexico nung 2006 küm nungi temesepba mozü shibelenba aser ozüng alema inyaksangshiba telok balala tsüngda mangatettep adokba ajanga nisung 450,000 dak tema tepsetogo.

K.S.U.M MDFA Trophy Semi Finals asayatsü jenjang ajangzüketetogo



NU Lumami aser K.S.U.M telok MDFA Trophy Quarter Finals asayadang tangokba noksa.

Mokokchung, October/Mongputeni 23(TYO): MDFA Trophy 2024 tanabuba quarter finals tanu nikongdang 1:00 PM nungi tenzuka NU Lumami aser K.S.U.M tsungda asayaogo. Iba asaya nung Match Patron Shri.Imtiyapang Councillor, Mokokchung Municipal liasü.

Iba asaya tenzükeler kelen minute 7 buba aser minute 16 buba nung K.S.U.M telok nungi J.no-18 Naoman Konyak-i goal-2 yok ano iba sülen kasa telok nungisa minute 42 buba nung J.no-10 Pangteh Konyak-i goal-1 yok iba sülen minute 45 buba nung

NU Lumami telok nungi J.no-11Neilie Konyak-i goal-1 yok aser anisüngzükba mapang agi.

Anisüngzükeler tanaben ground-i aita asayaba mapang minute 81 buba nung K.S.U.M telok nungi J.no-17 Bumang Konyak-ia goal-1 yok, anungji tanu iba asaya K.S.U.M teloki goal 4-1 agi NU Lumami kokteta MDFA Trophy Semi Finals asayatsü jenjang ajangzüketetogo.

Iba asaya nung K.S.U.M telok nung J.no-1 P.Angki,J.no-18 Naoman Konyak aser J.no-11 Baoman Konyak par asem yellow card achi.

MDFA Trophy 2024 tasembuba quarter finals October 24 nü nikongdang 1:00Pm nungi tenzuka Super Seniors aser MMSC tsungda asayatsü aser iba asaya nung Match Patron Er.Achanger T.Aier SDO Electrical alitsü.

MDFA TROPHY 2024
"Fueling Passion, Inspiring Dreams"

3rd Quarter Final Match
 DATE:24th OCT.2024 TIME:1:00PM

MATCH PATRON
Er. Achanger T.Aier
SDO Electrical

INTRODUCTION OF PLAYERS
SUPER SENIORS Vs MMSC

Dominic Thiem tennis asaya nungi anisüngzükeler

Mongputeni/October 23, 2024 (Agencies): Austria nunger tennis asayar Dominic Thiem, shibai taoba mapang US Open koker lir pa Mongolbarnü Vienna Open nung Luciano Darderi-i 6-7 (6-8), 2-6 agi akokba sülen asaya nungi anenogo.

Pa küm ishika tekanük yiruba ajanga junga masayateti arur linük nung asayaba asayamung ka nung tatabangsa asaya-a asaya nungi anisüngzükeler.

Iba küm tetenzükelen Thiem-i pa tennis asaya nungi anisüngzüketsü ta shir liasü, kechiyong pa 2021 küm yiruba sülen nungi khen danga junga masayateti aruogo.

Mongolbarnü nikongtsütsü Italy nunger arishi küm 22 taina sayar Darderi-i mezüngbuba set bo amokbanger masayai tie-

break asayaba sülenang akok.

Ajisüaka tanabuba set nungbo world number 42 yagi tajungba asayateta Thiem 6-2 agi ayong ayonga koka liasü.

"Küm tem tsungda ni nongita yariba atema nenok ajak dang kanga pelar. Pungmang ka ama asayaogo," ta pai asaya tembangba sülen fan 10,000 shi adenshia lia ashi, shirnoki pa nem nokdaker teka malokja tenüngsang aser tetushi agüja liasü.

Taoba mapang world number three asayar Thiem, shiba tang jenjang 318buba nung lir, pa Vienna nung iba ATP 500 asayamung nung asayatsü atema wildcard ka nüngdaka liasü.

Arishi küm 31 tain Austria nunger asayar indang career ya 2020 küm US Open final nung Alexander Zverev akokba sülen

nungi kanga mejungi aküm.

Iba asayamung akokba mapang nungbo pai Roger Federer, Novak Djokovic aser Rafael Nadal nunger dena toktepa asayatetsü ta bilema liasü.

Ajisüaka 2021 küm tom nung pa Mallorca nung asayaba mapang ligament yiruba sülen küm tepeyong masayatet.

2022 küm pa Grand Slam ana dang asaya aser pa indang rank küm ter tsungda top 100 temai tugua liasü.

Thiem, shiba 2011 küm pro aküm pa Mongolbarnü iba ATP asayamung masaya tsungda küm tepeyong nung main draw asaya ana dang koker liasü.

Thiem-i pa indang career tepeyong nung asayamung 17 kokogo aser sen USD million 30 dak tema aazükogo.

NRAI-i ayongzuka India nung shooting league asayatsü

Mongputeni/October 23, 2024 (Agencies): National Rifle Association of India (NRAI)-i Bodhbarnü sangdong ka ajanga, "Shooting League of India" ta nungja agütsür linük nung tang mezüngbuba franchise-based league ka asayatsü aliba sangdongogo.

Iba league ayongzuka asayatsü atema NRAI tir Kalikesh Narayan Singh Deo-i benoka liasü aser national federation indang governing body-i agizükogo.

Alima ajanga nung iba asaya achaayangba lokti tentet, International Shooting Sport Federation (ISSF) nungi temelaba agiba sülen iba asayamung atema mapang ka atakzükogo.

Iba league mezüngbuba ya taruba küm March ita asayatsü.

Deo-i ashiba agi, "Shooting asaya ya talisa taküm asayaba Paris Olympics nung kanga junga asayaba sülen kanga nungtugu kümogo aser onoki league amenoktsü atema tang ya mapang tajung ta bilema liasü.

ICC Test rankings: Rishabh Pant-i Virat Kohli ajatetogo



Rishabh Pant

New Delhi, Mongputeni/October 23 (Agencies): Bodhbarnü sayaba ICC Test rankings nung Rishabh Pant batter tem rongnung jenjang trokbubai tua külem India nunger asayar Virat Kohli ajatetogo.

New Zealand den mezüngbuba Test asaya nung tanabuba innings nung run 99 yangluba sülen Pant jenjang asem tejakdangi tuogo aser kasa mapang nung Kohli, shibai Bengaluru nung run 70 yanglua liasü, pa tenetbuba nung lir.

India nunger rongnungi opener Yashasvi Jaiswal ajak dang temaba jenjang nung lir. Pa tang pezübuba nung lir. India captain Rohit Sharma jenjang ana asepzuka lua tang 15buba nung Sri Lanka nunger asayar Dimuth Karunaratne den külemi lir.

"Onoki kanga junga ayongzuka asayaba franchise league tem ajanga asaya nungtugu kümdaktsüba dang masü iba ajanga terpranger tasen atsüa aruba aser parnok aser asayartem atema rongsenketzung jenjang tajungba kümdaktsüba nguogo.

Iba asaya ya self-sustainable kümdaktsütsüji asayartem atema onok tinyaktsü lir," ta pai ashi.

Paris Olympics nung India nunger shooter temi medal asem ngua liasü.

"Shooting asaya Olympic form aser format nung asayaba ya television friendly bo masü. Ajisüaka onoki iba dak sendakba nung sensaksem kaogo aser inyakyim tajung ka apiteter ama bilemer," ta pai ashi.

"Takok angutsü imla atati, kechiyong league ya iba asaya aser asayartem shirnoki international jenjang nung linük asoshi mapang shia konang tetushi bener arutsüdar parnok asoshi lir," ta Deo-i ashi.

Batter tem rongnung England nunger asayar Joe Root maneni temaba jenjang nung lir.

Bowler tem rongnung New Zealand nunger Matt Henry tekububai tuogo aser kasa mapang nung Rachin Ravindra (jenjang 36 tejakdangi tua 18buba) aser Devon Conway (jenjang 12 tejakdangi tua 36buba) nata batter tem rongnung tejak dangi tuogo.

New Zealand team-i otsüsütsüsa Bengaluru nung India team wicket ti agi akokba asaya nung Henry-i wicket ti agi aser külen team mate Will O'Rourke-ia wicket tenet agia pa jenjang ana tejakdangi tua tang 39buba nung lir.

Kasa mapang nung England den asayaba mapang innings ana nung wicket 11 agiba sülen Pakistan nunger spinner Noman Ali-a jenjang 17bubai tuogo aser Pakistan nungersa Sajid Khan jenjang 22 tejakdangi tua tang 50buba nung lir. Iba asaya nung pa nem Player of the Match naroküm agüja liasü.

Bowler tem rongnung India nunger fast bowler Jasprit Bumrah maneni temaba jenjang nung lir aser pa sülen teammate R Ashwin lir. India nunger rongnung ano Ravindra Jadeja-a Test bowler tem rongnung tenetbuba nung lir.



Major Dhyan Chand National Stadium, New Delhi nung India aser Germany na mezübuba asayaba mapang Germany nunger asayar Henrik Mertgens-i goal ka idaktsüba sülen külem teammate tem den pelatepba noksa nung angur. Iba asaya ya Germany-i goal 2-0 agi koka liasü.

BILEMDANGANG
 "Tetsübu agi nükjidong aika raksatsür."